



**Nunaqarfinni illoqarfinnilu isorliunerusuni ineqarniarnikkut pissutsit ilungersunartut qaangerniarlugit illunik nutaanik kiisalu aserfallassi-masunik nutarterinissamik anguniaqarluni suliaqartoqarnissaa pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Hans Enoksen, Partii Naleraq)

Demokraatini isumaqarpugut inuit sapinngisamik annerpaamik inuunerminnut oqartussaassasut. Nammineq akisussaaffigissavaat aamma nammineq iliuuseqassapput inuunertik pitsanngorsarniarlugu. Tamanna atuuppoq nunaqarfinni aamma illoqarfinni.

Ukiorpasuarni siullermik danskit naalagaaffit, kingornalu namminersorerullutik oqartussat massakkullu namminersorlutik oqartussat kalaallinut illuliortarsimapput. Eqqarsaat ajunngikkaluartoq kisianni inunnut isiginneriaaseq ataatungaaniittoq nunasiaataanerminngaanneerpoq. Isumaqartoqarpoq kalaallit nammineq imminnut illuliuusinnaanngitsut, taamaattumik illuliuuttariaqarpagut. Demokraatit paasisinnaanngilarput sooq peqataanik taava eqqartussagipput namminersulivinnissarput innuttaaqatigullu nunaqarfimmiut pillugit qanga nunasiaateqarnerup nalaani pinnittarsimanertulli.

Aamma naalagaaffiup imaluunniit namminersorlutik oqartussat inuit illutaarniarneranni isumaginnittuussariaqarnerannik eqqarsartarneq ineriartornermut killilersuisimaqaaq. Aallaqqaammut illuliarineqartartut assigiiaat tassaapput ullutsinni IKEA-p nioqqutigisartagai sofat. Piffissami tassanerpiaq siumut isigineruvoq. Kisianni taamani pisimasut ullutsinni atorsinnaajunnaarnikuupput.

Nunarsuup sinneranut qissimikkutta, taava ukiut kingullit ingerlanerini illut ineriartupiloornikuupput. Nunarsuup sinnerani naliginnaanngitsunik illuliortoqartarpoq. Assersuutigalugu suleqatigiinnianik peqartoq tuluttut taaneqartartunik earthships, kalaallisut taaneqarsinnaasut nunami umiarsuaasat. Quinakujuppoq, kisianni isumaavoq illup immiut imermik kissartumik pilersorsinnaanissaa, nammineq eqqagalerinermik tunngaveqarnissaa aamma nukimmik immiut pilersornissaa. Illut issumik biillu assakaasukuinik sanaajuppoq.

Kisianni soorunami maani Kalaallit Nunaanni issoq assakaasukullu saqquminerpaanngillat, taamaattumik taamatut aaqiinnisaaq piviusorsiornerpaajunngilaq. Kisianni isumassarsiat atornerqartut eqqarsaatigineqartariaqarput. Assersuutigalugu innaallagissiortoqarsinnaavoq seqernup kissarnera anorisaatillu atorlugit. Aamma inuit anaat gasimik pilersitsissutaasinnaapput tamaasillutillu kiassarnermi atornerqarlutik assersuutigalugu illu inissinneqarsinnaavoq anori seqinerlu iluaqutiginerpaasinnaanngortillugit.

Eqqarsaatit taamaattut eqqarsaatigineqanngisaannarput eqqarsartuarutta namminersorlutik oqartussat sumininnguit tamaasa isumagisassagaat, illuliortoqassatillugu.



Upperaarput inuit ataasiakkaat nammineq aalajangiingangata imminnullu isumagingaangata taava angusat pitsaanerpaasartut, namminersorlutik oqartussanik isumalluuteqarnerminngaanniit. Imaanngilarli ikiuutissanngitsugut. Assersuutigalugu iluaqutaassaaq isumagigutsigu nukissiuutinik atuinikittunik illut ilisimatusarfigineqarnissaat. Iluaqutaassagaluarpoq kalaallit nammineq illuliornermut atorniartarfiuteqartuugutta misileraalluni illuliornermut atukkiisinnaasunik. Iluaqutaassagaluqaaq allatut illulioriaatsit Kalaallit Nunaata sinneranut siammartuugutsigit aaqqiissutitoqqat uteqattaaginnarnagit, danskit naalagaaffiata nunasiaateqartup kalaallinut ajunnginnerpaasorisaat atuinnaqinagu.

Taamatut oqaaseqarluta oqallilluartoqarumaartoq kissarpugut.